

الثلاثاء 29-12-2009

851-التدريب عن بعد :الإشراف على العلاج النفسى (72)

المأزق: بين سر المهنة، واحتمال الضرر

أ.أكمل عبد الجليل : هى بنت عندها 17 سنه فى تالته ثانوى حضرتك حولها لى من حوالى شهر كده هى قعدت معايا بالظبط 4 جلسات جاية بمشاكل سلوكية يعنى ومغيش مذاكرة ومحاولات انتحار، وهى دخلت مستشفى تانية مرة قبل كده

د.يحيى : وبعدين

أ.أكمل عبد الجليل : فيه محاولات انتحار متعددة يعنى مشاكل كلها سلوكية يعنى بالنسبة للبنت، الأب والأم منفصلين يمكن من وقت ولادتها يعنى الجواز ما استمرتش شهور وبعدين حصل حمل واتولدت وبعدين حصل طلاق على طول بعد ولادتها بشهر يعنى الأب بعيد خالص مالهوش علاقة بيهم، عايش حياته وهو متجوز ومخلف ثلاث أولاد من الجديدة، والأم ماتجوزتش ومعها البنت دى وعايشه مع بقية أسرتها.

د.يحيى : الأم بتشتغل أيه ؟

أ.أكمل عبد الجليل : بتشتغل سكرتيرة فى مؤسسة خاصة، والبنت عايشة مع الأم وخالتين والجد والجده فى بيت واحد مع بعض، يعنى فالخالات هما اللى مربين البنت ، يعنى العلاقة بينها وبين مامتها وحشه أوى من إعدادى لحد دلوقتى

د.يحيى : الأب بيشتغل إيه قلت لى

أ.أكمل عبد الجليل : الأب شغال موظف كويس، بس هو بعيد مالهوش علاقة بيهم، مابيصرفش عليهم، حتى المبلغ اللى المحكمة حكمت للبنت بيه نفقة كان 50 جنيه بيدفعهم بعد خناق كل مرة، ومرة يدفع ومرة لأه،

د.يحيى : خمسين جنيه فى الشهر؟!!

أ.أكمل عبد الجليل : أيوه

د.يحيى : وهى الأم لها دخل غير ماهيتها

أ.أكمل عبد الجليل : مساعدات بقى مش منتظمة، ماهو خالاتها اللي هي قاعدة معاهم مش متجوزين، وبishtغلوا، وجدها معاشه معقول وكده يعنى،

د.يحيى : المشكلة بقى؟

أ.أكمل عبد الجليل : هي البنت كانت هربت من البيت وباتت بره ليلتين، فدخلوها المستشفى، هي دلوقتي جت قالت لى على حاجة الأهل مايعرفوهاش، قالت لى إن هي متجوزة عرفى راجل أكبر منها بحوالى ضعف السن عنده 36 سنه وهي عندها 17 سنه، وأنا مش عارف أعمل إيه، يعنى الجواز العرفى ده طبعاً أنا مش موافق عليه خالص، بقالها 7 شهور متجوزة، وأهلها مايعرفوش، وهي مستأمنان جداً على السر ده، والأهل بييجوا معاهم، مش عارف أقول لهم ولا ماقولهمش

د.يحيى : هي والراجل ده بيتقابلوا كل قد إيه، وفين؟

أ.أكمل عبد الجليل : لأ مفيش مواعيد محددة هي بتحاول تزوغ درس، تعمل نفسها بتخرج تجيب حاجة، تروح له تقعد معاه ساعة فى الشقة وترجع، حاجة زى كده

د.يحيى : شقة مين؟

أ.أكمل عبد الجليل : شقته هو

د.يحيى : هو ساكن لوحده؟

أ.أكمل عبد الجليل : آه هو كان متجوز وطلق

د.يحيى : عنده عيال

أ.أكمل عبد الجليل : لأه

د.يحيى : طب وعرفى ليه بقى ما دام حر كده، وعنده 36 سنة، وتمام التمام

أ.أكمل عبد الجليل : هي بتقول عشان مايلمسنيش فى الحرام وحاجات كده

د.يحيى : ليه، هوه الجواز الرسمى هوه اللي حرام ولا إيه؟

أ.أكمل عبد الجليل : هو ما عندوش استعداد أنه يعلن رسمى، وهي مش قادره تبعد عنه، وفى نفس الوقت قالت أخلينى كده خد ما أخلص دراسة

د.يحيى : تخلص؟ وبعدين تعمل إيه؟ تطلق عرفى، ولا يتجوزها رسمى؟

أ.أكمل عبد الجليل : هو اللي مش عايز الجواز يبقى رسمى

د.يحيى : ليه بقى؟

أ.أكمل عبد الجليل : هي بتقول إن أهلها حايرفضوا لأن هما يعرفوه يعنى

د.جيجي : بس انت بتقول إن هو اللى رافض

د.جيجي : أنا فهمت إنه بيدعى إنه رافض عشان هى قالت له إن فى الغالب أهلها حا يرفضوه

د.جيجي : حا يرفضوه ليه ؟

أ.أكمل عبد الجليل : هما عارفينه، وعارفين إن له علاقات كتير، و كان مصاحب خالتها شوية

د.جيجي : مصاحب مين؟!!

أ.أكمل عبد الجليل : خالتها، هو ساكن فى الشارع اللى وراهم على طول

د.جيجي : السؤال بقى؟

أ.أكمل عبد الجليل : ما انا قلت من الأول، أقول لأهلها ولا ما أقولشى

د.جيجي : إنت بتشوف أهلها

أ.أكمل عبد الجليل : آه، باشوف خالتها، وشفتمامتها، وطلبت باباها شفتم مرة واحدة وفعلا لقيتم بعيد خالص، ما لوش وجود فى حياتها ولا فى وعيها خالص

د.جيجي : إنت رأيك فيه إيه، فى أبوها

أ.أكمل عبد الجليل : راجل مش مهتم بالمره، يعنى مش فارقه معاه، بيقول هما اللى ربوها يكملوا بقى، هو بيعترها بعيدة، ما يعرفش عنها حاجة، ما لوش دعوة، بيرمى المشاكل على الأم وإنها هى السبب، وإنه حاول وحاول وحاول حاول يتقرب من البنت زمان وهى صغيرة، لكن أهل امها كانوا يرفضوا جداً وبيطردوه ويشتموه، فهو بيقول إن هما السبب فى مشاكلها دلوقتى فهو ملوش دخل بقى.

د.جيجي : طب انت عايز إيه دلوقتى؟

أ.أكمل عبد الجليل : ما انا قلت لخضرتك، أقول لهم ولا ما أقولهمشى؟

د.جيجي : الظاهر أنا كمان ضربت معايا خمة، عشان كده باين على بازوغ من الإجابة،

أ.أكمل عبد الجليل : إذا كان حضرتك تزوغ يبقى انا أعمل إيه؟

د.جيجي : هو من الناحية التاريخية يعنى والأدبية فيه مبدأ إن ما دام المريض قال للحكيم سر، يبقى مش من حق الحكيم يفشيه نهائى، وده زى حكاية كرسى الاعتراف عند أخوانا المسيحين، وفيه أفلام وحاجات اتعملت تتناول الموضوع ده، إنما المسألة بيتهيألى ما يصحح نسيبها مطلقة كده، إحنا

د. يحيى : والله يا ابني انت معذور، دا يمكن خالتها لسه بتحيه، ولأ نفسها فيه، وكلام من ده، ولما تعرف يمكن تزيد المصايب، وتغير، يمكن تفضحه وتفضح البنت وحاجات كده،

أ. أكمل عبد الجليل : أنا برضه فكرت في الاحتمال ده، وخصوصا إن خالاتها هما اللي ربوها، ومش عارف صورة خالتها دي بقت شكلها إيه وهى بمثابة أمها

د. يحيى: وبرضه معرفتها بالحكاية دي يمكن خلتها تستسهل الأمور بالشكل ده

أ. أكمل عبد الجليل : يمكن برضه

د. يحيى: بصراحة لما زادت اليمكنات، أنا ما عنديش رد جاهز دلوقتي، الراجل بيستعبط وبيقول إنه اتجوزها عرف عشان بيخاف من ربنا، واليبتن مصدقة ولا مش مصدقة، ما تفهمشى، يعني يمكن فيه ربنا في الموضوع، أظن فيه مراحل قدامنا لسه قبل ما نقرر نقول ولا ما نقولشى، أعتقد إن أمها غلبانة في الموضوع ده كله، اتطلقت من بدرى، وحتى البنت اللي طلعت بيها اخوتها استولوا عليها، أنا رأيي إنك تبتدى توثق علاقتك بأمها، شوية شوية، وتدرس شخصيتها بطريقة مباشرة، علاقتها باخواتها دول، وموقفها إيه من تصرف أختها اللي كانت ماشية مع الراجل ده، وبعدين ماتستسهلشى، وأنا أظن إن إنك تقدر تشتغل في علاقتها بأمها الأول، وبعدين بيها أكثر وأكثر لحد ما تلاقى سكه إن هى اللي تقول لهم يعني لما تثق فيك لحد ما تظمن لنصيحتك وبالتالي تبقى نصيحتك إن هى اللي تقول لهم مافيش مانع لو تقدر تقول للراجل ده إنها حاتقول لأهلها

أ. أكمل عبد الجليل : متهيأ لى هوه مش عايزها تقول لهم ولا حاجة، وهى بتسمع كلامه

د. يحيى : مش عايزها تقول طبعاً، يعنى واضح إن فيه خبطة واستغلال، يعنى بنت مافيش خبرة ومافيش دعم أسرى ومافيش بيت، راح الجدع ده عامل لها شوية حركات تغذى الاحتياجات الأولية بتاعتها، صعب تعتمد عليها وصعب تسببها برضه انت تشتغل وبسببك دلوقتي من الموقف الأخلاقي اللي ممكن يزعجك شويتين، ولو قدرت إن البنت تقول لهم في وقت مناسب يبقى خير وبركه، ولو اتنى مش عارف فاعلية انها تقول لهم حاكون موقفهم إيه في الظروف دي

د. أكمل عبد الجليل: إزاي يعنى؟

د. يحيى: فرجع واحدة واحدة: المستوى الأول اللي هو التكاليد والأصول، وبعدين التاني اللي هو الضرر والمسئولية، وبعدين التالت فاعلية القرار لو قالت لهم

نبتدى بقى من الآخر من فاعلية القرار إذا كان قرار مالوش فاعلية يبقى مافيش داعى للمستويات اللي قبله إذا

ضمنت إن القرار له فاعلية واقعية مش في منع اللي جارى، دا باين عليه مش حاجصل، لأ فاعلية في نمو البنت، مش احنا قلنا العلاج النفسى هدفه النمو عشان الواحد يبقى أكثر رؤية للواقع واكثر مسئولية عن الفعل، إذا كان الانتظار حايساعد في النمو، يبقى يساعد في العلاج النفسى اللي هو حايساعدنا في اتخاذ قرار ناضح له ما يترتب عليه ، ومن ضمن ده الإعلان واخبار الأهل، يعنى إذا كان حايترتب عليه جواز رسمى ودى حاجة مش محتملة أوى لأنه باين على الرجال وغد، وبعدين بيستغل بنت صغيرة بالشكل ده، طب افرض اتجوزها حتى ما أظنش حايكمل، وهى، ولو حبلت دلوقتى ما هو حايسقطها، بصراحة أنا كنت لسه حاجتج على إن تقديم الحالات كده بدرى بدرى بعد شهرين، مش تمام، إنما في حالة زى دى لأ، انت عندك حق، هنا فيه خوف إن العلاج النفسى يضرها لو سكتنا، البنت صغيره ويمكن تتصور إنك أبوها وموافق مادام قالت لك وانت سكت، يعنى موافق

أ. أكمل عبد الجليل : ما هو ده اللي أنا خايف منه

د. يحيى : هو الانتظار فرصة إن البنت تكبر بس مش مضمون في الظروف دى، يعنى باختصار الرد هو انتظر مع مسئولية كاملة في الثلاث مناطق دول، "تقاليد، والاداب المهنية، والضرر والضرار، فأظن أن الوقت هنا مهم، ويبقى الهدف واضح إن البنت تكبر ولو شوية صغيرين، تكبر يعنى تشوف الواقع مش تكبر يعنى تبطل، خصوصاً انى أظن أن العلاقة في السن دى مع واحد زى ده لها مبررات الاستمرار بشدة، فيها لذة وحركات واستقلال وحب واعتمادية وحاجات كده، يعنى لها مبررات قوية حاتلاقى نفسك بتحارب حاجة مش سهلة، ومع ذلك يمكن مع الزمن إنت تبقى أكثر أبوة ، وبالتالي تبقى أكثر حضور، في وعيها، وتبقى وحافز كويس لاتخاذ قرار مناسب، يعنى أنت عايز تقول لهم أيه بالضبط في الوقت ده، هو نكد والسلام؟ مادام مش حايترتب على القوالة أى حاجة مفيدة

أ. أكمل عبد الجليل : حاسس بالمسئولية

د. يحيى : بس تعالى نتصور سوا لو انت قلت للأمها، هل أمها حاضيف حاجة، هل هى حاتقول لأبوها اللي خالع، ولا حاتفضح اختها وخلص، ولا حاتطردها في الشارع؟ ما هو كله صعب، يبقى حتى إن احنا نقول للأمها لازم نشوف فاعلية القرار الأول، وفايدته، وتوقيتته

أ. أكمل عبد الجليل: يعنى استنى قد إيه؟

د. يحيى: قول شهر كمان، تستحمل وتحليك طيب، وابقى اعرضها علينا تانى بعد شهر، المهم البنت تنتبه لدروسها في نفس الوقت، وكلام من ده

أ. أكمل عبد الجليل: حاضر، ربنا يستر